


詹大悲先生事略

卷一

詹大悲先生事畧

詹大悲先生遺像





影撮之後難殉生先悲大詹

詹大悲先生事略

(一八八七—一九二七)

詹大悲君字質存，湖北舊黃州府屬蘄春縣人也。世居距縣治東北二百里之何家冲，至君祖父斗峯公以身爲繼出，而性質直，見惡於諸兄；君父竹亭先生謹飭自好，爲邑附生；父子守正不阿，不能安居於故宅，遂遷居毛家壠。君生而貌寢，聲音髮膚異常兒，何家冲人謂君爲怪物；以此不甚爲家人所喜。祖父獨鍾愛之，曰：「安知形聲異常兒者，成就之不異常兒耶！」君未四歲，夏日

傍晚未歸，家人四出覓君。祖母獲之，宅後半里許田壠中，問其所事，曰：「吾欲得一蛇以爲戲。」至七歲，祖父命竹亭先生授之讀。竹亭先生曰：「此子只合持十二斤鋤掘荒地，何用讀爲！」祖父親携至塾，竹亭先生乃授以三字經，教「性本善」之性字後，君即指「性相近」「性乃遷」兩性字曰：「此均性字也。」竹亭先生大驚異之。所教之字，自能聯綴成誦。弱冠以孤陋寡聞，無所質正，走四十里外訪名孝廉陳慶丹先生，始知讀書門徑。有江西曹秉泰君者，通數學，過君家，授君以算術四法。君經史之餘，兼習數理，昕夕研求，夜分不寐，父母恐其傷生，嘗傾其燈油以止之。

光緒三十三年黃州府開辦中學，君欲投考，家庭未允供其

資斧，而君竟赴府。適考期已過，尙未揭曉，請補試，監督吳兆泰激賞君文，拔置第一。府屬學生咸嘖嘖曰君矣。

同學宛思演君篋有禁書數冊，君盡窺之，革命之志以立。遂與宛思演何亞新方子樵梅寶璣等組織證人學會，宣傳革命。同學入會者甚多，事爲監督所聞，將除君名。君亦更思結納天下英才，遂於光緒三十四年赴武漢，欲於漢口辦報，無款不果。聞革命黨人胡瑛繫武昌獄，典質衣物周恤之，由是得識武漢黨人。諮議局議長湯化龍有時名，君不介而往，湯甚奇君。因論鐵路國有事，君頗反對。湯謂：「明達如君，不應反對鐵路國有。」君曰：「國有固當，清有則否。」湯聞言咋舌。君知湯不足與言革命，遂絕之時。

清政不綱，內爲親貴所蒙，外受強鄰之逼，俊雄豪傑，怵於國勢之顛危，知非推翻索虜，不足以救亡；而推翻統治勢力，非有所憑藉，亦不易奏效；故先後投入新軍。湖北創練新軍有年，其中頗多愛國憂時之士。劉家運、季汝霖等所組織之日知會，潘康時、楊王鵬等所組織之羣治學社，均以革命爲幟志，以新軍爲根據者也。君至武漢時，日知會失敗已三年，羣治學社雖存立而組織不甚完整，旋被破獲。君乃團結羣治學社同志，改組爲振武學社；自與宛思、演、查、光、佛、劉、堯、澂、何、海、鳴、李、寶、良、楊、王、鵬、李、岳、崧等於漢口辦商務日報爲社中宣傳機關。時宣統元年也。保皇黨楊度力倡川粵漢鐵路滿有，陰謀督辦一席，由湘經漢返京，君與同志謀擊之。

於迎賓館未中，而商務日報館被封，並波及振武學社。社中負責同志如新軍四十一標之潘康、時楊王鵬、李寶良、李岳崧等相繼亡命，振武學社根本動搖。時王憲章、蔣翊武等於二十九標組織一將校團。亦君所聯絡之革命機關也。宣統二年君乃商振武學社同志劉堯、張廷輔、王守愚等與將校團合併改組爲文學社，於漢口辦大江報爲社之言論機關，仍由君及宛思、演溫、楚珩、梅寶、磯、何海鳴等主之。經此團結，革命氣勢大張。君言語妙天下，能言人所欲言而不敢言者，故大江報風行一時。宣統三年，君見清運已終，著一時評，題曰大亂者，救中國之藥石也。鄂督瑞澂深忌之，即捕之入獄。軍中同志激昂萬狀，遂伏八月十九日大爆發之。

根。君在黃州府中學時名培瀚，旋更名瀚，主武漢後，精研內典，忽有所悟，故於報上論文，悉署名大悲，志所信也。清季湖北革命團體，文學社而外，有共進會，兩團體互通聲氣。君見新軍中革命勢力已大，雖在獄中，仍主張即日舉義，共進會之孫武陰沮之。卒至彭楚藩劉堯澂楊洪勝三烈士犧牲後，始有八月十九日之首義，仍不出君所逆料也。

義軍起，君出獄。武昌軍中雖推黎元洪爲都督，湯化龍主民政；二人均不知革命爲何物，擾攘二日，迄未定攻守計；陽夏一衣帶水，亦未派遣一卒。君會商蔣翊武張廷輔蔡濟民王憲章吳醒漢諸將領，倉卒率兵二連，與蔡濟民渡漢，成立軍政分府於漢口；

分遣宋錫全收撫漢陽；召集商民團體，曉以大義，使組織保衛團，分段維持秩序，市廛安堵，商民大悅，派員赴各領事署，告革命之故，卒得各國承認爲交戰團體，派吳暘谷任質存等赴川湘贛皖，促舉義師。清第八鎮統制張彪尙率兵一營駐劉家廟，與河南清兵會合犯漢，君擊走之。蔭昌段祺瑞等率馮國璋之兵，所謂北洋勁旅也，來犯，而武昌都督府者紛擾如故，不能爲君助，君力爲防守，以唐犧支已負荆宜之責，乃派闕龍蔡達夫章裕昆等規復襄棗，威脅京漢路。駐漢德領陰以軍實助蔭昌馮國璋軍，君嚴重抗議。君以新附孤軍，當清廷水陸久經訓練之衆，雖躬冒彈雨，身先士卒，終以衆寡懸殊，無法支拄。馮國璋縱火焚燒漢口。君返軍政

分府時，職員已避難星散。君欲以身殉，李文甫勸君速行，君瞑目不答。流彈已毀屋瓦，左右負之渡襄河，至漢陽，商王憲章赴湘，自赴九江請援，並報告黃興，期其堅守漢陽，蓋黃方任總司令，而湘贛均已舉義也。君抵九江，商馬毓寶派李烈鈞率兵援鄂。旋聞吳暘谷在安慶爲亂軍所殺，痛暈仆地，乃赴滬。適胡瑛奉政府都督山東，堅約君往助，君遂赴烟臺。

南北和議告成，君認妥協爲失計，以國人苟貪共和之名，避免犧牲之實，授政權於反革命派，無異授賊以刃，乃籌備亞東日報，冀以喚醒愚蒙，費絀未及出版而罷。和議成後，黨中欲於議會與袁世凱抗，君謂：「選舉縱全部獲勝，亦不如練精兵三萬監視

之爲有力。」宋漁父深諱其言，卒以黨議已定，君亦不便固持己見也。民國二年春，回鄂參與選舉，以得票最多數當選爲湖北省議會議員；黨鄂支部推君爲議長候選人。先是革命後之選舉，各地國民黨員較易當選。投機政客，紛紛入黨，選舉獲雋，遽然變節。黎元洪又以重金助反對黨，議長遂爲反對黨所獲。君任黨中漢口交通部長，與川湘豫皖贛諸黨部聯絡，以黎只知服從袁氏，密與王憲章楊王鵬等謀控制之。宋漁父遇刺於滬，袁世凱大借款已成，君知黨與袁決無兩立之理，集合各方同志悉心籌畫。乃南湖馬隊，首受摧殘。時倚方何子輿甯調元等先後殉義。王華國所率之第二師被解散。蔣翊武李達武等運動湘軍無結果。王憲章

潘康時曹振武章裕昆丁仁傑夏述唐鄭曜午等分任鄂西鄂北豫南軍事，均無成就。而黎元洪益肆無忌憚，封閉國民黨漢口交通部，請議會除君名，懸重賞，派密探緝君。君卒與蔡濟民吳醒漢潘康時王華國丁仁傑等分赴湖口安慶助義。湖口失守，又赴南京與王憲章王守愚朱澄宇曹振武何海鳴等死守孤城。馮國璋張勳水陸圍攻，相持匝月，以援盡糧絕不支，遂結癸丑討袁贛甯諸役悲壯之局。

民國二年春，總理在日本改組國民黨爲中華革命黨。以誓約問題，黨中發生紛議，君偕王憲章赴日，如約登記，奉命返滬。馮國璋遣密探僞與君等商革命事，誘君登車，君察其形色有異，陰

以肘撞車門，門闕仆地，以是得免。而憲章則被誘至甯死矣。馮又遣曾充省議會聯合會議長，王樹臣要君，別構偽造湖北官票罪名以相陷；約會於徐園。曹振武先至被逮，君乃走日本。旋返滬，袁世凱嗾暗探刺君，未遂，傷君從人范老么。袁必欲得君而甘心，君寓左近，密探如毛，避之溫楚珩寓中，卒與溫同被捕。美領以君國事犯，不能引渡，而袁馮所構之刑事案人證俱虛，胡亂判處西獄。袁世凱死，上海各團體迎君出獄。時省議會恢復，內務部規定：凡以國事除名者一律無效。湖北省議會全體決議歡迎君及趙鵬飛、梁鍾漢出席，趙梁亦係黎元洪以亂黨名義咨請除名者也。會議長辭職，舉行補選，君得票過半數當選。王占元忌之，對君等議

員資格持異議，而陰使候補議員杜瑞壽、丁榮學、戴撫夏等出席。君甚不欲爲無謂之爭執，不復列席。議長亦未再補選。中華革命黨成立後，鄂省未設支部。君乃與議會左傾分子結合，組織一政治商榷會，而自赴北方聯絡。周歷京津遼瀋。會督軍團造反，逼黎元洪解散國會。君返滬，與何成濬、蔡濟民、潘康時等謀護法。民國六年之荊州獨立，何成濬所策劃者爲多。何潘赴荊州後，君亦赴漢，謀響應。與孔庚、潘正道、王守愚等聯絡北洋第八師，師長王汝賢之通電停戰，卽君等示之意也。王占元初欲捕君等，繼與吳佩孚不睦，又囑何佩溶、孫傳芳、聯君及孔庚、君等峻拒之。時南北議和之說又盛，總理因南方改組軍政府，亦離開廣州。君知護法無

結果，乃商潘正道王守愚朱澄宇等赴川爲後圖。

世界大戰告終，人類之創傷絕鉅，痛定思痛，不能不對於軍國主義懷疑。學人志士之所提倡，農工小民之所呼籲，均有嚮別一方角演進之趨勢。雖以列強互鬥，致人類所希望之一線曙光，爲巨靈所遮斷。然世界思潮，確非戰前所可同日而語矣。我國雖文化落後，受此世界潮流之激盪，亦焉能襲故蹈常？所謂新文化運動者，遂如種出土，凡舊日之習慣道德思想禮教制度文物，莫不有所批評。君與張國恩李漢俊董用威等觀覽各種新出版物，研究社會問題，益信中國革命必能成功；而革命之成功必有待於新興勢力之參與，欲盡力於新文化，仍擬在漢口辦報，定名爲

漢口新報。君携章程赴閩粵招股，因夏述唐遇害於福州，股款未集，報事遂停。

民國九年冬，總理返粵，君任大本營宣傳員。十年夏與彭介石奉命赴川，商劉湘會同湘軍援鄂。時潘正道等已與劉有成議，君等至，遂出兵。潘正道任鄂西總司令，君隨營策劃。宜昌之役，親赴前線。川軍之攻宜昌者爲第二軍，肅清南岸者爲第一軍，一二軍積不相能，二軍攻宜不下，吳佩孚敗湘軍後，又親率水陸軍至宜昌防守。君夜渡江走四十里，說南岸一軍分兵過北岸助戰。川軍卒以孤立無援，退守施南。君赴桂林復命。陳炯明叛變，君隨總理回師討之。白鵝潭之役，總理危居兵艦，君亦隨侍。後許崇智自

閩舉兵討陳君，赴泉州，與何成濬商戰略。是時總理雖於廣州任大元帥，陳炯明負固東江，聯絡瓊崖鄧本殷等跳梁於外，滇桂軍驕兵悍將跋扈於內，以總理之精誠，若輩毫無感化。君曰：「革命而不置基礎於大多數痛苦民衆，徒爲軍閥造機會而已！」總理深然之。十三年一月中國國民黨改組後，開第一次全國代表大會於廣州，君以湖北省代表列席。總理所定聯俄容共農工三大政策，一部分守舊黨員，頗多反對。君以總理政策，適合革命需要，力贊成之。總理北上，君仍留大本營任宣傳員；逮聞總理逝世，悲痛之餘，益感責任重大。平定東江，討伐楊劉，君視力之所及，奔走先後。第二次東征，國民政府命君赴江西與方本仁商截擊陳林

潰兵事。方初頗疑懼，君詳加解釋，方始釋然。江西遂成爲廣東東北之一緩衝省。國民政府任君爲刑事審判委員，君以不諳法律辭，改任參事。十三年改組後，湖北省及漢口特別市黨部相繼成立，因處軍閥壓迫之下，報告中央文件時被扣留，後由君轉達，中央與武漢關係始漸密切。

民國十五年一月開第二次全國代表大會於廣州，君亦代表之一，大會政治報告決議案，君所起草也。君當選爲候補中央執行委員。第一次全體中央執行委員會畢後，國民政府命君爲駐上海代表，與各方接洽。五月廣州開第二次全體中央執行委員會，討論整理黨務案，當時有思乘機推翻第二次全國代表大


會決議案者；中央委員或則憤不列席，或則不便發言，君獨侃侃直陳，無所迴避。決議案多出於君之修正，甚至有反於提案人所豫期者。北伐誓師後，君以要方本仁收撫江西事赴滬，方已免職居滬也。旋偕方返粵，即赴長沙。君於途中受暑，聞總攻擊令下，力疾從軍，趕趨前線。圍攻武昌時，君常在火線中出入也。

漢口下後，代表總司令慰問漢口人民。中央任君武漢政治分會委員，總司令部委君爲湖北政務委員會委員兼建設科長，湖北財政委員會委員。政治分會爲黨中地方最高機關，議決關於黨務軍民財政諸大計劃。鄧演達任政務委員會主任，陳公博任財政委員會主任，均以君熟悉地方情形，事無大小，咸與商酌。

君亦竭力贊助之。兩委員會任君爲清理湖北官錢產業委員會主任，象鼻山鐵鑛局局長。君之清理湖北官錢局產業也，理契約，清積欠，設委員會以保管約據。君之經營象鼻山鐵鑛也，時方對東南作戰，營業未充，然汰冗員，節糜費，禁拋砂，廓清以前積弊。君之任建設科長也，首拆毀武昌城，以爲新武昌市張本；設立航政局維持武漢交通，檢查沿江船舶；最要者爲設立水利局，規畫全省堤工。十五年湖北大水，官堤民堤，十有九潰，報水災者三十餘縣。水患之後，繼以兵荒，民堤亦無力修復。財政當局，因應付軍需，視堤工爲緩圖。君曰：「三十餘縣災民，一入冬令，飢寒交迫，難保不生事端，以工代賑，救荒要著，一也。堤成則人民有田可耕，衣食

有資，來年不須籌賑，二也。湖北半爲山縣，有堤各縣，皆財富之區，收穫可期，輸將有自，三也。堤身新潰，基址尙存，及時修復，費省工易，棄而不顧，再經冲刷，蕩然無餘，從事版築，工艱費鉅，四也。且明年春汛以前，必須歲事，遲則無及。一政治委員會以君言極中事理，決議設一堤款委員會以主持之。君一面召集堤務有關各縣代表，討論進行程序；一面擬具籌款方法，上之堤款委員會，先後用去約二百萬元，皆君親往提撥。湖北已潰各堤，因是得如期竣工。君於用人行政，先提出黨部討論而後執行。凡有求而不獲，因而不慊於君者，遂飛短流長，捏造黑白，以中傷君。君欲一意辦黨，乃辭去清理湖北官錢局產業委員會主任，及象鼻山鐵鑛局局

長，建設科長亦請人代理。是時君已當選爲漢口特別市黨部執行委員兼組織部長也。祕密組織時，漢口僅有四千餘黨員；革命軍到達後，黨員驟增至二萬人以上。君爲之劃分區域，規定會期。設訓練幹事參加各區分部常會，君亦時往列席。十六年三月，東南肅清，財政部長宋子文赴滬，政府任君代理湖北財政處長。省政府成立，仍任君爲湖北省政府委員兼財政廳長。武漢市政府成立，又任君爲市政府委員。財政廳所管轄者雖有釐金、雜稅、地丁、契稅等項，均直接解交中央金庫，財廳稽核成數而已。釐金之害，人盡知之，君以爲旣不能根本裁撤，必須設法改良。卡多則病商，稅漏則病國，兼籌並顧，宜有其途。特設一物價調查委員會，官



商合組，以便改訂稅則時有所根據。召集稅務人員，討論裁併局卡，改徵統稅辦法。至國地稅之必須劃分，省金庫之如何籌備，莫不悉心論列，可次第見諸實行。

會唐生智去職，以武力迫君籌款，君避之日本租界。君以爲藉此可以息肩，不圖有十二月十七日之變。時省政府於先一日收束，君與省政府委員兼教育廳長李漢俊同寓。是日午後四時，財廳祕書危誥生來商交代事，湖北公鑛局長潘康時亦在座。突有警兵多人至，將君及李漢俊潘康時危誥生等捕去。至公安局，君問故，監視者不之答；請見其長官，亦不之許。君謂潘危兩君曰：「吾輩欲與臬鏡同羣，宜有今日！君等如倖免，須秉承總理遺志，

繼續國民革命。一語甫畢，即有警兵來挈君及李漢俊出，遂同時遇害。武漢衛戍司令胡宗鐸既殺君，並抄沒君寓。寓中有前主人漆桶十餘隻，以爲銀也，扛之去；啓視則漆也，乃返之。友人溫楚珩、朱澄、字熊繼貞等，齎資，由君壻魏以新購棺衾殮殮。

君天資英特，獨學無友，能自得師。博覽羣書，洞悉世變，不爲因襲之習慣道德所囚，遇其所信，則排萬難以赴之。爲民族爭獨立，人民求自由而奮鬥者幾二十年，追隨總理者十餘年，無役不從，屢陷危獄；其志不少挫，蓋得於釋典者深而了然於生死得失之故也。本大無畏之精神，奉先總理之主義，凡貪橫軍閥，腐敗官僚，惡劣豪紳，一切封建遺毒，蟠踞於黨內黨外而足爲未來文明

之障害者，君不惜與之作殊死戰。以故忌君而畏君者，所在皆有。君正盛年，通方敏給，其所任事，熟思審處，策劃周詳，逐步施行，總其大綱，不事苛細。故於湖北主政日淺，而成績燦然可觀。時人屬望於君者頗殷，以君橫遭新軍閥之戕賊，而又無地爲之昭雪，故尤致痛惜焉。

君生於光緒十三年丁亥六月十四日，遇害時僅四十歲。父母俱存。兄弟八人，君次居仲，七弟大星於民國十六年五月以作農民運動爲叛軍捕殺。女弟二人。女一嫁魏以新，子一，幼，與妻寄居友家。



#78
27264

47291

8
2344

120

1213